

REGIONAL NEWS

HEADLINES:

1. Vawiin hi kum 2026 chhunga Pathianni hmasa ber a ni a, kohhran hrang hrangah Sande sikul hming ziah leh pawl siamrem hun atan hmang.
2. Tuihri leng avanga Siaha district leh Myanmar inkar ramri khar chu naktuk atangin hawn a ni dawn.
3. Naktip, January ni 6 atang hian ni hnih awh tur, Phuaibuang Tlaizawng Paradise hman tan a ni dawn.
4. Ni 8 chhung awh tur, National Volleyball Tournament vawi 72-na, Prime Minister Narendra Modi-a'n Varanasi-ah a hawng.

<><><>

FIRST SUNDAY

Vawiin hi kum 2026 chhunga Pathianni hmasa ber a ni a, kohhran hrang hrangah Sande sikul hming ziah leh pawl siamrem hun atan hman ani.

Krismas leh kum thar lawm a nih hnuah, nimin atang khan Mizo mipui-in khawsak phung pangngai an zawh tan leh tawh a, nimin kha Inrinni a nih avangin sorkar pisa erawh hawn ala ni lova. Naktuk hi kum thara sorkar pisa kai tan hun a ni a. Nilaini khian sikul an lut leh tan bawh ang. Vawiinah khan Mizoram kohhran hrang hrangah Sande sikul hming ziah ni a nih avangin biak-in tinah ni dang aiin inkhawm an thahnem a. Sande Sikul pawl siam rem ni atan an hmang hlawm bawh .

Kumin 2026 ah hian Presbyterian kohhran chuan puitling Sunday School ah "Kristiante leh ram rorelna" tih Rev. Dr. H. Lalrinthanga ziah an zir dawn a. Nilai zan leh Beihruah thupui atan Rev. Lalfakzuala buatsaih "Mizo Kristian hla leh a phuahtute" tih an zir dawn a ni.

Salvation Army corps-te chuan kumin Sande sikul puitling ah "Mathaia ziah zirchianna" tih Pu F Lalchhandama buatsaih an zir anga. Inrinni zan sipai inkhawm leh beihruah thupui atan "kohhran enkawl dan" tih an hmang dawn a ni. Baptist kohhran chuan vawiin Pathianni hmasa ber, chawhnu inkhawmah Baptisma leh Lalpa zanriah sakramen an kilho a kumin 2026 Puitling Sunday school ah "Joela leh Jona" tih Rev VL. Nithanga ziah an zirdawn a ni.

Seventh-day Adventist kohhran chuan nimin khan Lalpa zanriah (sacrament) an kilho a. Mizoram-ah pawh Adventist kohhran 100 chuangah Lalpa Zanriah hian kilho ani. Lalpa zanriah an kil hma hian Isua leh a zirtirte tihdan dungthul-in ke insilsak tawn hun an hmang a, hei hi tlawmna nun entirna a ni. Ke insilsakte chauh hian zanriah an kil thin. Damlohna avanga harsatna neite chu an inlamah an panchilh bawh. Lalpa zanriah hi Adventist kohhranah chuan Isua Krista ringtu apiangte tana tel theih a , a tlangpui thuin kum bul intanna (Sabbath hmasa) ah an kil thin a, kum khatah vawi 4 an kil a ni.

<><><>

AIZAWL AQI

Mizoram Pollution Control Board (MPCB) khawlin a teh danin January ni 2 chhun dar 12:00 vel khan Aizawl Air Quality Index (AQI) chu 80 a ni a, hei hi halpuah hal runpui aṅanga darkar 36 hnu a ni.

MPCB-in boruak hrisel dan a enfiahna khawlpui ber Aizawl Sikulpuikawna 'real time data' hmuh theihna chu Central lamah khawl a chian loh avangin kumhlui thlah zana zanlai data an hre thei lova, pawl an tih thu an sawi. A tuk January ni 2 chhun dar 12:00 vel khan Aizawl AQI chu 80 a nih thu erawh an hre thei ani. Halpuah hal hma ni December ni 31 tlai dar 4:00-ah AQI chu 38 a ni a, heta ṅanga a lan danin AQI hi a let 2 chuang hret (za zela 210)-in a pung a ni. Data aṅanga a lan danin boruaka bawlhhlawh sin te bik, particulate matter 2.5 micron, (PM2.5) an tih mai hi Aizawl khawpuiah a pung chho nasa hle niin an sawi baw a, December thla bikah kum 2024 ah PM2.5 hi chawhrualin 19 µg/m³ chauh a nih laiin kum 2025 ah chuan 38 µg/m³ a kai chho tawh a, a letin a pung tihna ni an ti.

MPCB hotute chuan PM2.5 hi chuapa lut awlsam, paih chhuah leh theih si lo a tang ta tlat thin a nih avangin a pawl zual niin an sawi a. Kumtluana boruak dinhmun thlirin Aizawl khawlpui boruak hi a kum telin a letin a bawlhhlawh tial tial a ni tih a tilang a ni, an ti a. Boruak tibawlhhlawh thei thil hal lo tura mimal, pawl leh sawrkar pawhin tan lak deuh deuh pawimawh an tih thu leh mihring hriselna chu thupui bera neih theuh ni se a duhawm an tih thu an tarlang baw.

<><><>

CHOLERA

Tuihri leng avanga Siaha district leh Myanmar inkar ramri khar chu naktuk atangin hawn a ni dawn ta.

Siaha district Additional DC Pu Abraham Beirazi Khithie chuan tun dinhmunah tuihri natna vei an awm tawh loh avang leh tuihri lenna khawmite an biak kualna-ah hri darh a awm tawh bawh loh avangin vawiin thlenga Myanmar ramri khar tura thupek lo awm tawh chu pawhsei ngai tawh lova an ngaih thu Akashvani Aizawl news a hrilh a. naktuk atangin Myanmar ramri a inkalpawhnate hawn a ni tawh dawn niin a lang ani. Puan tawh angin nikum November thla khan tuihri avangin Siaha district-ah mi 3 an thi a. December thla chawhnu lam khan Tipa community health centre (CHC)-ah tuihri natna vei enkawl 6 an awm leh avangin Addl. DC chuan nikum December ni 23 khan Myanmar ramri kharna thupek a chhuah a. January ni 4 thleng khar phawt a nih tur thu athupek chhuahah chuan tarlan a ni.

He tih lai hian district thenawm Lawngtlai district-ah pawh tuihri leng hi a zia-awm tawh a. December thla laihawl vela Lawngtlai a Lairam Christian Medical Centre & Hospital a mi 8 dahluh bak tuihri kai thar an awm tawh lo niin an sawi a. Lawngtlai district bawhsap Pu Donny Lalruatsanga chuan December ni 23 a Myanmar ramri kharna thupek a chhuah chu thil thleng thar engemaw a awm leh a nih loh chuan kar leh Inrinni (January ni 10) khian hlih tum a nih thu a sawi bawh. Puan tawh thin angin Lawngtlai district-a Kakichhuah khua-ah November thla khan tuihri avangin mi 6 an thi a, December thla khan mi 4 thi lehin mi 10 an thi tawh a ni.

<><><>

DRUG-RELATED FATALITIES

Excise & Narcotics department chhinchhiah danin nikum 2025 chhung khan Mizoram-ah ruihhlo kaihhnawh avangin mi 111 an thi a, kum 20 liam ta chhunga ruihhlo kaihhnawih avanga thi an tam ber kum a ni.

Excise & Narcotics bakah Police lam chhinchhiah danin nikum chhunga ruihhlo kaihhnawih avanga thi 111 zinga mi 93 chu mipa an ni a, 18 chu hmeichhia an ni a, kum 2004 hnua Mizoram chhunga ruihhlo kaihhnawih avanga thi an tam ber tum a ni. Nikum September thla atanga Mizoram sorkarin ruihhlo do beihpui 'Operation Jericho' a kalpuihnu-ah ruihhlo lo lut nasa taka a tlem phah rualin, ruihhlo avanga thihna a pung thung a, kum 2024-ah ruihhlo avanga thi mi 67 an awm laiin, nikum-ah erawh mi 111 an awm a ni. Kum 2004 kha Mizorama ruihhlo vanga thi tam ber kum a ni a, hemi kum hian ruihhlo hmansual vangin mi 143 an thi a. Central YMA chuan Ruihhlo Do chu kum puanah hmangin SRS dinin nasa taka ruihhlo do a ni a, a kum leh, 2005-ah chuan ruihhlo vanga thi zat hi 42-ah a tla thla a ni.

He ti hian kum 1984 a heroin avanga thi pakhat an chhinchhiah tan atanga nikum kum tawp thlenga Mizorama ruihhlo vanga thi zat chu mi 1,990 an tling tawh a, an zinga 1,746 chu mipa niin hmeichhia 244 an awm bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

TLAIZAWNG PARADISE

Naktip, Thawhlejni (January ni 6) atang hian ni hnih awn Phuaibuang Tlaizawng Paradise chu hman tan a nih dawn thu Tourism department hotute'n an sawi.

Tourism department hotute'n Akashvani Aizawl news an hrilh danin hemi rual tho hian Tuivai lui-ah nghakuai chiah runpui buatsaih a ni dawn a. Nghakuai chiah runpui hi assembly speaker Pu Lalbiakzama'n Thawhlejni chhun lai dar 12-ah a hawng ang a. Zan dar 7 atangin zan lam hun a intan ang a. Speaker leh Phuaibuang VCP ten thu an sawi bakah zaithiamte an zai bawk ang. A tuk January ni 7-ah chuan Phuaibuang VC leh tlawmngai pawl kaihhruaina hnuaiah chhun lamah adventure sports huaihawt a ni dawn a, ramngaw hnuaia a thui tak kal (trekking), ke a zin (hiking) leh puka luh te a awm ang a. Mark Events in engkim buaipui-in puan-in kaiha ramhnuaia a zan riah pawh a theih dawn a, sleeping bag keng tan chuan puan-in kher lovah pawh a riah theih dawn a ni. Zan dar 7 atangin zaithiamte nena hun hman leh a ni ang a. Hetah hian Tourism Minister Pu Lalnginglova Hmar pawh a tel dawn a ni.

A tan ni a Tuivai luia nghakuai chiahna hmun tur hi YMA-in sangha an humhalh lai a ni a, sangha tam hle tura ngaih a nih thu Tourism department hotute chuan an sawi a. A hmunah nghakuai lei tur a awm ang. Tlaiah Phuaibuang khua a luhin khawtlangin an siam chaw ei tur a awm ang - Hmar bai dik tak sa tui tak tak a awm dawn a. Ei man pek a ngai a, ei man hi Phuaibuang khua-in an tel vek dawn a ni.

IIMC

India rama media lam zirna lian zinga mi Indian Institute of Mass Communication (IIMC) chuan kumin atangin Ph. D zirna an hawng thar. Aizawla North East Regional Campus awm ve mek, Ministry of Information & Broadcasting hnuaia din, IIMC-ah hian a tirah chuan Post Graduate Diploma kum khat course hrang hrang a awm thin a. Tunhnaiah University-a kaisantir chhoh mek niin 'Deemed to be University' ah dah a ni . Nikum atang khan Masters degree kum hnih course hrang hrang dah tan a ni a. Tihchangtlun zelna turin kumin January ni 1 khan Ph.D zirna hi full time leh part-time-a zir theih turin hawn a ni leh ta a ni.

<><><>

PM INAUGURATES VOLLEYBALL TOURNAMENT

Vawiin khan Prime Minister Narendra Modi-a'n video conferencing atangin National Volleyball Tournament vawi 72-na, Varanasi-ah a hawng. Thu sawiin Pu Modi-a chuan kum 2014 atangin infiamna chi hrang hrangah India-in nasa takin hma a sawn chho, a ti a, kum 2036 Olympics thleng turin chak takin hma lak mek a ni, a ti bawk. Ni 8 chhung awn tur, ram pum huap volleyball tournament-ah state leh institution hrang hrang atangin team 58 an tel a, inelna hi vawiin atang khan tan nghal a ni.

<><><>